



Uunga siunnersuut: Sumiiffinni immikkut toqqakkani takornariartunut kiffartuussinernik ingerlatsinissamut akuersissuteqartarneq pillugu Inatsisartut inatsisissaattut siunnersuut

(Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)
(Siullermeerneqarnera)

Naalakkersuisunut qujanaq siunnersuuteqarnissinnut.

Demokraatinut pingaartuuvoq, takornariaqarnerup ineriartortuarlunilu siuariartortuarnissaa. Suliaqarfik pingaartuuvoq, nunatsinni tamarmi siuariartornermik pilersitseratarsinnaasorujussuaq. Uatsinnulli aamma pingaaruteqarluinnarpoq, inuussutissarsiut sapinngisamik piffimmi ingerlanneqassasoq, uagut kalaallit nunatta ineriartorneranut eqeersimaartumik uummaarissumillu peqataasinnaaniassagatta.

Taamaattumik iluarisimaarparput, una siunnersut sumiiffinni immikkut toqqakkani takornariartunut kiffartuussinernik ingerlatsinissamut akuersissuteqartarnermut tunngasumi piunasaqaaserneqarsimammat, minnerpaamik ingerlatsinissamut akuersissuteqartoq 50 procentimik kalaallinit pigineqassasoq. Taamaalilluta qulakkiissavarput, isertitat annerpaartaasa nunatsinniiginnarnissaat.

Taamatuttaarlu iluarisimaarparput, aalajangiisarneq, taakku pineqartut ingerlatsinissamut akuersissuteqartarneq kommuniniissammat. Taamaaliornikkut qulakkeerneqassaaq, isummernerit piffinniinnissaat aammalu piffinni ilisimaarinninneq pingaartinneqassalluni.

Paasisinnaavara, piffinni aallaaniat, aalisartut, paarmanit nuniattartut allallu annilaangagissappassuk, akuersissutip pinngortitap sungiusimasamittut atornissaanut ajoqutaasinnaanera. Taamaattumik nuannerpoq, siunnersuummi ersarimmat, nunaqavissut piniarnissaminnut, aalisarnissaminnut pinngortitamiinnissaminnullu pisinnaatitaajuassammata, nunaminertaq pineqartoq suliniutillu akuersissuteqarnermi piunasaqaatinut ilaagaluarpataluunniit.

Siunnersuut taamatut oqaaseqaatitalerlugu Inuussutissarsiornermut- aamma Aatsitassanut ataatsimiititaliamut suliareqqitassanngorlugu innersuunneqarpoq.